

- केन्द्र सरकार साल 2027 मांय दो चरणां मांय जनगणना री प्रक्रिया सरू करण रो फैसलो कर्यो ।
- विश्व पर्यावरण दिवस माथे काले दुनियाभर मांय प्राकृतिक संसाधनां रा संरक्षण अर प्रदूषण कम करण री अलख जगाई जायेला ।
- श्रीगंगानगर मांय नकली खाद बीज बणावण वाळा माथे आज दूजे दिन ई छापामारी—छह फैकिट्रयां सीज़ ।
- प्रदेश मांय आथूणी विक्षोभ रा असर ऊं काले ई केर्इ ठौड़ां विरखा री आस ।

000

केन्द्र सरकार साल 2027 मांय जनगणना री प्रक्रिया सरू करण रो फैसलो कर्यो है । इण रे साथै ई जातिगत गणना ई करी जायेला । 1 मार्च 2027 ऊं आ प्रक्रिया दो चरणां मांय व्हेला । केंद्रीय गृह मंत्रालय बयान मांय कह्यो है के लद्धाख अर जम्मू—कश्मीर, हिमाचल प्रदेश अर उत्तराखण्ड रा के बर्फीलां हलका सारू 1 अक्टूबर, 2026 ऊं जनगणना सरू व्हेला । जनगणना करावण री अधिसूचना ई म्हीना री 16 तारीख ने गजट मांय छपण री आस है । लारली जनगणना साल 2011 दो चरणा मांय करी ज्यी ही ।

000

विश्व पर्यावरण दिवस काले मनायो जायेला । आखी दुनिया मांय पर्यावरण संरक्षण सारू जाग जगावण सारू ओ दिन मनायो जावे । ई साल रो मुद्दो “प्लास्टिक प्रदूषण को समाप्त करना” राख्यी ज्यो है । ई मौके प्रधानमंत्री नरेन्द्र मोदी नुवी दिल्ली मांय खास वृक्षारोपण अभियान री सरुआत करेला । श्री मोदी एक पेड़ मां के नाम पहल रे तैत बरगद रो पौधो लगावेला । ओ सात सौ किलोमीटर री अरावली पर्वत शृंखला ने फेरु वनीकरण करण री पहल व्हेला । इण ने अरावली ग्रीन वॉल परियोजना नाम दीरीज्यो है । इण रो मकसद राजस्थान, दिल्ली, हरियाणा अर गुजरात रा 29 ज़िलां मांय अरावली पर्वत शृंखला रे आरे—सारे पांच किलोमीटर हलका ने हर्यो—भर्यो बणावणो अर अरावली री जैव विविधता ने बधावो देवणो है । विश्व पर्यावरण दिवस रे मौके प्रदेश मांय ई केर्इ आयोजव व्हेला । राज्य थर रो ज़ल्सो जयपुर रा राजस्थान इंटरनेशनल सेंटर मांय व्हेला । कार्यक्रम मांय मुख्यमंत्री भजनलाल शर्मा सिरकत करेला । श्री शर्मा ई—वेस्ट कलेक्शन ड्राइव अर वर्चुअल पांच लवकुश वाटिकावां री सरूआत करेला । इण रे साथै ई सांगानेर रा सामान्य अपशिष्ट उपचार संयंत्र रो लोकार्पण करेला । इण रे पछे मुख्यमंत्री रो बूंदी रा केशोरायपाटन मांय वंदे गंगा जल पूजन महोत्सव मांय हिस्सो लेवण रो कार्यक्रम है । श्री शर्मा काले सुजानगंगा मांय दीपदान करेला । प्रदेश मांय काले ऊं वंदे गंगा जल संरक्षण—जन अभियान री सरूआत व्हे री है । इण री मार्फत प्रदेश मांय भूजल थर बधावण अर जल संचयन री खास ठौड़ां ने पाछा जीवत करण री मुहिम चलायी जायेला ।

20 जून तांई चलाया जावण वाळा ई अभियान मांय लोगां ने पाणी बचावण अर पाणी भेळा करण रो संदेश दियो जायेला । मुख्यमंत्री भजनलाल शर्मा प्रदेशवासियां ऊं ई पहल ऊं जुङ्ग री अरज करी है ।

.....

राज्यपाल हरिभाऊ बागडे बत्ती छायादार अर भरपूर ऑक्सीजन देवण वाळा पौधां लगावण माथे जोर दियो है। श्री बागडे विश्व पर्यावरण दिवस री पैली सिंज्यां जयपुर मांय व्ही समिट मांय बोल रह्या हा। वणा दफ्तरा, सार्वजनिक ठौड़ां माथे पैड़ लगावण अर वां री वाजिप देख—रेख करण री बात कही। जयपुर मांय आज रन फॉर एन्वायरमेंट व्ही। वन राज्यमंत्री संजय शर्मा इण ने हरी झंडी दिखा र रवाना कर्या। इण ऊं पैला वणा प्रतिभागियां ने पर्यावरण संरक्षण री शपथ दीरायी। चूरू अर हनुमानगढ़ मांय ई पर्यावरण जागरुकता दौड़ री मार्फत लोगां ने प्रकृति संरक्षण रो संदेश दीरीज्यो।

000

संसद रो मॉनसून सत्र 21 जुलाई ऊं सरु व्हेला। सरकार आज इण रो ऐलाण कर्यो। इण ऊं पैला विपख रा दलां ऑपरेशन सिंदूर माथे चर्चा सारू संसद रो खास सत्र बुलावण री मांग करी ही। नुवी दिल्ली मांय संसदीय कार्य मंत्री किरेन रिजिजू कहयो के सत्र 12 अगस्त ताईं चालेला।

000

सरकार राष्ट्रीय नारकोटिक्स हैल्पलाइन नम्बर 1933 अर मानस पोर्टल लांच कर्यो है। मादक पदार्था रे खिलाफ जीरो टॉलरेन्स नीति रे तैत इण री सरुआत करी ज्यी है। गृह विभाग रा संयुक्त शासन सचिव महेन्द्र कुमार खींची बतायो के हैल्पलाइन माथे झ्रग्स तस्करी री सूचना साझा करण करी जा सके है। इण रे साथै ई नशा रा आदि लोगां रा पुनर्वास अर सलाह मुहैया ई करायी जा सकेला। वणा लोगां ऊं आ सेवावां ने काम मांय लेवता झ्रग्स—फ्री समाज बणावण मांय भागीदारी निभावण री अरज करी है।

000

अंतर्राष्ट्रीय योग दिवस रे मौके आकाशवाणी जयपुर रा क्षेत्रीय समाचार एकांश कानी ऊं संदेश कडी चलायी जावे। इण मांय आज सुणां जयपुर री योग प्रशिक्षक शांग्रीला जैन रो संदेश। वां रो कहणो है के योग प्राचीन भारत री अनमोल धरोहर है। इण री प्रासंगिकता अबार रा बगत मांय घणी बध ग्यी है।

000

कृषि मंत्री डॉक्टर किरोड़ी लाल मीणा री अगुवाई मांय श्रीगंगानगर मांय आज दूजे दिन ई नकली खाद बीज बणावण वाळा माथे छापामारी करी ज्यी। घणी गडबडियां मिलण माथे छह फैक्ट्रियां ने सीज करी ज्या। ई दौरान अहलकारा मौका माथे ई घणी तादाद मांय नकली बीज जब्त कर्या। आं ने रसायन ऊं भर्या झमां मांय राख्यी ज्या हा अर कैमिकल री मार्फत बीजां ने चमकदार बणाया जाए रिया हा। आ नकली बीजां ने ब्रांडेड कम्पनियां रा नाम ऊं पैक कर ने मंहगां मोल माथे बेची जाय री ही। म्हाणा श्रीगंगानगर खबरनवीस बतायो के फोर—एमएल मांय बिना लाइसेंस रे चाल री फैक्ट्री माथे ई कार्रवाई करता गेहूं रा मिलावटी बीज पकड़्या।

000

मुख्यमंत्री भजनलाल शर्मा री नियमित जनसुणवाई काश्तकारां सारू समस्या समाधान रो जरिये बणी है। जयपुर जिला दुर्घ उत्पादक सहकारी रा सदस्यां ने लारला कुछ म्हीना ऊं संबल योजना रो फायदा नी मिल रहयो हो। योजना री सब्सिडी दुर्घ उत्पादकां ने नी मिली ही। संघ रा संचालक मंडल जनसुणवाई मांय मुख्यमंत्री सामी आप री समस्या बतायी। मुख्यमंत्री संवेदनशीलता दिखावता अहलकारां ने तुरत प्रदेश रा काश्तकारां ने बकाया सब्सिडी रो भुगतान करण रा निर्देश दिया। इण माथे प्रदेश रा सगळा काश्तकार पशुपालकां रा खाता मांय मुख्यमंत्री दुर्घ उत्पादक संबल योजना रे तैत सब्सिडी सीधी

हस्तान्तरित करी ज्यी। मुख्यमंत्री रा ई फैसला ऊं कोई साढे चार लाख काश्तकार पशुपालकां ने फायदो व्हयो है।

000

उपमुख्यमंत्री दिया कुमारी आज जयपुर मांय मॉनसून पैली री तैयारियों री समीक्षा मीटिंग करी। निर्माण भवन मांय व्ही ई बैठक मांय वणा पीडब्ल्यूडी महकमां रा अहलकारां ने मॉनसून मांय अलर्ट मोड माथे रहवण रो निर्देश दिया। ई दौरान उप मुख्यमंत्री सङ्कां री मरम्मत अर पाणी री निकासी बन्दोवस्त री ई जाणकारी ली। वणा मॉनसून रे दौरान पाणी भराव री समस्या ऊं निपटण अर भारी बिरखा रा अंदेशा वाळा हलकां री पीछाण करण ने कह्यो। मीटिंग मांय पीडब्ल्यूडी सगळा सगळा संभागां अर ज़िलां रा अर एनएचएआई रा अहलकार वीडियो कांफेन्स री मार्फत जुड़्या।

000

प्रदेश मांय आथूणी विक्षोभ रो असर काले तांई बण्यो रहवण रा आसार है। मौसम महकमां मुजब इण ऊं बीकानेर, जयपुर, कोटा अर भरतपुर संभाग मांय कठेई—कठेई आंधी रे साथै बिरखा व्हे सके है। वर्ते ई 6 जून ऊं आंधी बिरखा री गतिविधियां मांय कमी आवण अर तापमान मांय बढ़वार री आस है। ई बीचे, बीकानेर, जयपुर, अजमेर, कोटा अर भरतपुर संभाग रा कुछ हलका मांय गरज रे साथे हळका ऊं मझळा दर्जा री बिरखा रो सिलसिलो चाले। चूरु ज़िला मांय आज न्यारी—न्यारी ठौड़ां बिरखा व्ही। म्हाणा खबरनवीस बतायो के सरदारशहर मांय एक घंटां तांई मूसलाधार पाणी बरस्यो। इण ऊं केई ठौड़ां पाणी भरीज र्यो।

000